



**Pareser ba Komisaun B Parlamentu Nasional RDTL kona-bá
Proposta Lei Orsamentu Jeral Estadu 2021
ba Setor Defeza, Seguransa no Negosiu Estranjeiru**

“Prespetiva Sosiedade Sivil”

Mehein Nia Lian Nú. 150, 30 Novembru 2020



Foto: Livru Orsamentu Jeral Estadu 2021

Fundaasaun Mahein (FM)
Website: www.fundasaunmahein.org
2020



Kontiudu sira

Kontiudu sira	2
Introdusaun	3
Metodolojia	3
Proposta OJE 2021 ba Defeza, Seguransa no Negosiu Estranjeiru	3
Defeza Nasional: Servisu Militar Obrigatoriu	4
Seguransa Interna: Polisiamentu Komunitária	5
Investigasaun Sientifika no Kilat	8
Rekomendasaun	10
Bibliografia	11

Introdusaun

Relatóriu ne'e nu'udar análiza husi Fundasaun Mahein (FM) kona-bá Proposta Lei Orsamentu Jeral Estadu (OJE) 2021 – iha ne'ebé Proposta Lei ne'e Governu submete ona ba Parlamentu Nasional iha loron 15 Outobru 2020. Nune'e ba tinan 2021 total OJE tomak hamutuk US\$ 1,895,000,000¹.

Iha kuadru Proposta OJE 2021 aloka ba prioridade lima no prioridade ida maka konsolidasaun no fortalesementu defeza, seguransa no negosiu estranjeiru ho nia orsamentu hamutuk US\$ 158,830,873 (8.8%).² Relatóriu ida ne'e la halo análiza ba institusaun sira maibe area espesifiku sira ne'ebé tuir FM prezisa diskute kle'an antes implementa no ida ne'ebé implementa ona prezisa mellora diak liu-tan. Área espesifiku sira ne'ebé sai atensaun prinsipal husi FM iha relatóriu ida ne'e maka hanesan implementasaun servisu militar obrigatoriu, polisiamentu komunitária no investigasaun kriminal ho kilat.


Metodolojia

Relatóriu ne'e nia análiza bazeia ba monitorizasaun FM nian kona-bá implementasaun polítika Governu nian ba asuntu sira defeza no seguransa ho Proposta Lei OJE 2021. Nune'e hodi konklui relatóriu ne'e liu husi metodu ne'ebé FM adopta maka *Security Sector Discussion* (SSD). SSD hanesan diskusaun ne'ebé involve peskizador sira husi FM nian hodi diskute no análiza ba materia sira ne'ebé relaciona ho relatóriu ne'e nian no hamosu rekomendasaun sira.

Proposta OJE 2021 ba Defeza, Seguransa no Negosiu Estranjeiru

Husi total orsamentu ne'ebé aloka ba konsolidasaun no fortalesementu defeza, seguransa no negosiu estranjeiru ho nia orsamentu hamutuk US\$ 158,830,873 (8.8%). Grafika iha kraik ne'e en-jeral hatudu kona-bá alokasaun orsamentu ba institusaun sira defeza, seguransa no negosiu estranjeiru inklui investigasaun kriminal nian.

Figura 01: Orsamentu ba Setor Defeza, Seguransa no Negosiu Estranjeiru



Fontes: Proposta Lei Orsamentu Jeral Estadu 2021

¹ Proposta Orsamentu Jeral Estadu 2021, Livru 2 Planu Asaun Annual

² Proposta Orsamentu Jeral Estadu 2021, Livru 2 Planu Asaun Annual

Defeza Nasional: Servisu Militar Obrigatoriu

Iha Programa VIII Governu Konstitusional nian ba setor defeza hatete “Governu sei promove servisu militar, nu’udar dever patriótiku no inkute iha profesionais setor ida ne’e atu sai modelu ezemplar ba sidadania no integridade” nomos sei alkansa liu husi objetivu ida maka “promove estudu no reflesaun kona-bá obrigatoriedade ba servisu militar³”. Implementasaun ba programa ne’e, hahu uluk revogasaun ba Estatutu Militar F-FDTL nian (Decreto-Lei n.º 7/2014, de 12 de março, alterado pelo Decreto-Lei n.º 28/2016, de 13 de junho). Nune’e Estatutu Militar F-FDTL foun (DECRETO-LEI N.º 33 /2020 de 2 de Setembro NOVO ESTATUTO DOS MILITARES DAS FALINTIL-FORÇAS DE DEFESA DE TIMOR-LESTE) introdus mos Servisu Militar Obrigatoriu iha dekretu ne’e. Kontinuasaun husi ne’e – Governu liu husi Ministru Defeza apresenta mos regulamentu kona-bá Servisu Militar Obrigatoriu ho forma dekretu-lei no aprova ona iha Konsellu-Ministru iha loron 28 Outobru 2020 no haruka ona ba Prezidente Repúblika estuda no promulga⁴.

Iha âmbito Proposta Lei OJE 2021 Ministériu Defeza hetan alokasaun orsamentu hamutuk US\$ 14,050,485 no F-FDTL hamutuk US\$ 25,171,729. Maibe Planu Asaun Anual 2021 Ministériu Defeza no F-FDTL nian la temi klaru kona-bá implementasaun Servisu Militar Obrigatoriu. Maske nune’e, normalmente Lei ida tama iha vigor tenke implementa husi ministériu ne’ebé administra setor ne’e nian.

Nune’e, haree ba orsamentu ne’ebé aloka ba Defeza no Militar tinan 2021 nian husi total OJE tomak hamutuk 2,4%. Husi total ida ne’e – kompara ho Nasaun sira ne’ebé implementa Servisu Militar Obrigatoriu orsamentu ne’e la suficiente. Ezemplu Singapura ne’ebé implementa mos Servisu Militar Obrigatóriu gasta 1/4 husi total orsamentu Estadu nian kada-tinan ba setor defeza.⁵

Hanesan FM kestiona iha relatóriu dahuluk katak programa ida ne’e nu’udar realizasaun ba mehi sira husi Primeiru-Ministru Taur Matan Ruak nian desde tinan 2007. Tamba programa ne’e la ho estudu ruma ne’ebé prova katak iha duni nesesidade ka lae atu implementa Servisu Militar Obrigatoriu iha Timor-Leste, hanesan temi iha Programa VIII Governu Konstitusional nian⁶.

Governu argumenta katak Servisu Militar Obrigatoriu “hodi hatan ba nesesidade militar nian” ka F-FDTL. Maibe argumentu ida ne’e dook tebes husi realidade F-FDTL nian. Prespetiva estratéjika kona-bá polítika defeza nasional, iha exersísiu formulasaun polítika

³ Programa VIII Governu Konstitusional, 2018. Asesu iha ne’e: http://timor-leste.gov.tl/wp-content/uploads/2018/09/VIII-PROGRAMA-GOVERNU-REVISTU-HOKONTRIBUISAUN_CONSELHODMINISTROS200720181.pdf

⁴ Komunikadu Imprensa Sorumutuk Konsellu Ministrus nian iha loron 28 fulan-outubru tinan 2020. Asesu iha ne’e: <http://timor-leste.gov.tl/?p=26006&lang=tp>

⁵ GLOBAL MILITARISATION INDEX 2019. Asesu iha ne’e: https://www.bicc.de/uploads/tx_bicctools/BICC_GMI_2019_EN.pdf

⁶ Relatóriu Fundasaun Mahein, 2020. Implementasaun Servisu Militar Obrigatoriu iha Timor-Leste. Asesu iha ne’e: <http://www.fundasaunmahein.org/wp-content/uploads/2020/10/MNL-149-Servisu-Militar-Obrigatoriu-2020PDF.pdf>

defeza Estadu ida nian, ameasa no interese estratéjiku maka determina estrutura forsa defeza nian. Tamba ne'e implementasaun ba programa sira nune'e, sei baralla deit dezvoltimentu F-FDTL nian. Iha ne'ebé kondisaun F-FDTL nian hanesan infraestrutur, facilidade no ekipmentu sira sei dook husi "suficiente" hodi akomoda joven sira ne'ebé ho idade 18 ba leten hodi kumpri Servisu Militar Obrigatoriu.


Hanesan mos Planu Força 2020 (Estudu Força 2020) ne'ebé expire daudauk ona. Iha ambisaun ne'ebé a'as maibe la realistiku no kontestual, ikus mai dokumentu mahar ida ne'e la konsege implementa. Mesmu Ministériu Defeza estabese Gabinete Força 2020 hodi tau matan ba ninia implementasaun maibe orsamentu la suficiente hodi realiza mehi a'as ne'ebé hatuur iha dokumentu ne'e.

Tamba ne'e Governu fó prioridade ba revizaun Planu Força 2020 hodi estabese postura forsa defeza ida ne'ebé realistiku no kontestual. Iha disciplina formulasaun polítika defeza nian, iha buat prinsipál tolu; interese estratéjiku, postura forsa no aliñamentu planu forsa ho kbiit finanseiru Estadu nian. Atu formula polítika defeza ida koerente no klaru, prezisa interaksaun diak entre fator tolu ne'e⁷.

Seguransa Interna: Polisiamentu Komunitária

Relatóriu Avaliasaun Oficial Polísia Suku (OPS) tinan 2018 hatudu polisiamentu komunitária hetan progresu no tulun ona comunidade sira. Iha avaliasaun ne'e rekomenda ba Komandu Jeral PNTL no Ministériu Interior continua mellora servisu OPS (polisiamentu komunitária) nian. Maske nune'e, tuir Proposta OJE 2021 ba PNTL – polisiamentu komunitária nu'udar subprograma ida husi programa tomak PNTL nian no aloka orsamentu kiik liu US\$ 663,255⁸ kompara difikuldade ne'ebé OPS (polisiamentu komunitária) hasoru.

Figura 02: OPS (polisiamentu komunitária) nia Vizibilidade




Fonte: The Asia Foundation, Relatóriu Avaliasaun OPS, 2018

⁷ Relatóriu Fundasaun Mahein, 2013. Servisu Militar Obrigatoriu Iha Timor-Leste. Asesu iha ne'e: http://www.fundasaunmahein.org/wp-content/uploads/2013/05/MNL_Nu.-53_27052013_Militar-Obrigatoriupdf.pdf


⁸ Proposta Orsamentu Jeral Estadu 2021, Livru 2 Planu Asaun Annual

Figura 03: Impaktu Prezensa OPS



Fonte: The Asia Foundation, Relatóriu Avaliasaun OPS, 2018

Figura 04: OPS nia Difikuldade



Fonte: The Asia Foundation, Relatóriu Avaliasaun OPS, 2018

Figura sira iha leten demostra kona-bá PNTL nia estratejia no filozofia polísia komunitária durante implementasaun doutrina VIP (Vizibilidade, Involvimentu no Profesional). Iha ne'ebé 80% OPS vizibel ona iha komunidade no sente seguru ho prezensa OPS nian. Maske nune'e OPS hasoru difikuldade oin-oin hanesan deskreve iha figura 04.

Iha sorin seluk, OPS (polisiamentu komunitária) sai difikuldade liu tan bainhira Lei Orgânica foun PNTL nian pasa. Los duni revizaun ba Lei Orgânica PNTL nu'udar prioridade ida husi Planu Estratéjiku PNTL 2014-2018 ne'ebé *expire* ona iha tinan 2018. Maibe revizaun ida ne'ebé daudaun ne'e iha gabeta Komandu Jeral PNTL no Ministériu Interior hetok halo polisiamentu komunitária sai ameadu hanesan deskreve iha kraik ne'e.



Primeiru, esbosu ka projetu Dekretu-Lei Orgânica PNTL ne'ebé mahar tebes hamutuk pajina 61 no nia dispozisaun sira hamutuk artigu 91 maibe dokumentu mahar ida ne'e *Copy-Paste* deit husi lei orgânica polícia-paramilitar Portugal nian. Liu-liu kopia husi Lei n.º 2/2007 de 6 de Novembro, Orgânica da Guarda Nacional Republicana nian. FM apresia mos servisu Asesor sira husi Guarda Nacional Republicana (GNR) Portugal nian hodi tulun PNTL sai polícia ida profesional. Maibe Projetu Dekretu-Lei Orgânica PNTL ne'ebé elabora husi Asesor sira kopia lolos husi Lei Orgânica GNR nian no la refleta ho natureza polisiamentu PNTL nian. Portantu, GNR hanesan forsa seguransa ida ne'ebé nia natureza militar no PNTL hanesan forsa seguransa ida ne'ebé nia natureza sivil no nia estratéjia no filozofia polisiamentu, iha karakteristikidade polícia komunitária.

Segundu, tamba *Copy-Paste* deit husi Orgânica GNR nian entau Estrutura Komandu PNTL iha Projetu Dekretu-Lei ne'e hanesan mos akontese iha Komandu GNR nian ne'ebé ho natureza militar. Nune'e, estratéjia no filozofia polisiamentu PNTL nian ne'ebé hatuur iha Projetu Dekretu-Lei ne'e "polícia komunitária" sei sai hanesan *slogan* deit.

Terseiru, Projetu Dekretu-Lei ne'e hamosu unidade sira ne'ebé la nesesariu no habokur deit estrutura Komandu PNTL nian. Exemplu, unidade foun ne'ebé sei harii maka Unidade Manutensaun Ordem Pública no Unidade Polícia Fiskal no Aduaneira. Maibe PNTL mukit ba rekursu no unidade sira ne'e dupla deit servisu sira iha institusaun seluk nian.

Kuartu, Projetu Dekretu-Lei ne'e mai hakloot liu tan kompetênsia sira servisu no departamentu sira PNTL nian. Ezemplu Servisu Investigasaun Kriminal muda ba departamentu no altera tiha kompetênsia balu. Alterasaun kompetênsia sira iha investigasaun kriminal nian hodi hamosu fali Unidade Polícia Fiskal no Aduaneira nomos Departamentu Protesaun Natureza. Maske servisu sira unidade no departamentu ne'e nian durante ne'e hala'o husi Unidade Investigasaun Kriminal iha âmbito investigasaun kriminal.

Kintu, iha Projetu Dekretu-Lei ne'e fó kompetênsia ba Departamentu Polisiamentu Komunitária hadau tiha kompetênsia sira ne'ebé durante ne'e hala'o husi Oficial Polícia Suku (OPS) liu-liu iha servisu sira negosiasaun, mediasaun no prevensaun konfliktu ka krime. Lolos Departamentu Polisiamentu Komunitária haree liu ba area estratéjiku sira hodi tulun Komandu PNTL iha âmbito supervizaun no ezekusaun modelu polisiamentu komunitária ne'ebé PNTL adopta. Portantu polisiamentu komunitária la'os unidade ka departamentu ida nian maibe membru PNTL tomak hala'o polisiamentu komunitária. Hanesan hatuur ona iha Projetu Dekretu-Lei ne'e katak polícia komunitária hanesan estratéjia no filozofia polisiamentu PNTL nian.

Tamba Projetu Dekretu-Lei ne'e *Copy-Paste* deit no karik pasa ka hetan aprovasaun, PNTL sei lakon ninia natureza lolos hanesan "polícia komunitária" no substitui hanesan "polícia paramilitar ida" nu'udar modelu ne'ebé GNR adopta. Nune'e mos PNTL nia situasaun, liu-liu unidade no departamentu foun sira sei hahu fila-fali husi zero, hanesan infra-estrutura, facilidade, ekipamentu, formasaun no pesoal sira.

Investigasaun Sientifika no Kilat

Dekretu-Lei N.º 21/ 2014 de 6 de Agosto 1.ª Alteração ao Decreto-Lei n.º 15/2014, de 14 de Maio, Orgânica Polízia Sientífika Investigasaun Kriminal (PSIK). Hatuur PSIK hanesan korpu superiór polízia kriminál, ne'ebé organiza tuir ierarkia iha Ministru Justisa nia mahon ho autonomia administrativa, finanseira no patrimoniál.

Husi dispozisaun Lei kriaun PSIK nian difine mos uzu no porte arma husi membru PSIK sira. Tuir artigu 20 autoridade polízia kriminál sira, pesoál investigasaun kriminál no pesoál ausiliár investigasaun kriminál nian iha direitu ba uzu no porte ba kilat servisu nian, kalibre no tipu ida-ne'ebé diploma ministerial Ministro da Justisa nian. Husi dispozisaun artigu 20 nian, Ministériu Justisa iha loron 24 Maiu 2017 hasai ona diploma ministerial ida hodi define kona-bá arma fogu ne'ebé sei hola ba pessoal PSIK sira.

Diploma Ministerial N.º 33/2017 de 24 de Maio Aprova o Tipo e o Calibre das Armas de Fogo de Serviço do Pessoal da Polícia Científica de Investigação Criminal (PSIK). Diploma ne'e nia objetu aprova tipu no kalibre arma fogu ne'ebé bele utiliza husi pessoal PSIK, tuir termu sira iha lei, nomos regra sira akizisaun, distribuisaun no uzu nian. Ho Diploma Ministerial ne'e define tipu kalibre ba arma fogu ne'ebé pessoal PCIC iha direitu atu uza ho tipu pistola kalibre 9 X 19 mm.

1. Nesesariu ka lae PSIK lori kilat?

PSIK nia natureza sientífika, ho apoiu laboratóriu polízia sientífika nian, nu'udar sentru prinsipál liu ne'ebé fó apoiu ba investigasaun kriminál no garantia ne'ebé metin no rai didi'ak buat hirak ne'ebé sai nu'udar prova, no responsável ba rekolla, tratamentu no ezame ba vestíjiu krime nian no perísia forense, hodi hatán buat hotu-hotu no hatán nafatin ba nesesidade investigasaun kriminál sientífika no ho konfiansa. Nune'e PSIK maka halo deit investigasaun ba krime grave, organizada ka kompleksa.

Misaun husi PSIK nian maka atu fó tulun ba autoridade judisiál sira, dezenvolve no promove asaun prevensaun, detesaun no investigasaun hirak ne'ebé hola parte iha ninia kompetênsia ka hirak ne'ebé autoridade judisiál competente sira delega ba nia, hanesan aseguara sentralizasaun nasional ba informasaun kriminal. Nomos ninia koadjuvasaun ba autoridade judisariu sira, PSIK fó tulun ba autoridade judisiál sira iha prosesu sira ne'ebé iha relasaun ho krime sira ne'ebé delega ba nia atu halo investigasaun ka bainhira husu ba nia atu foti medida sira ne'ebé iha molok julgamentu no rekere kuiñesimentu ka meiu tékniku spesiál sira. Iha prosesu penal PSIK sei atua iha dresaun nia mahon no sei la'o tuir Ministériu Públiku ka juís prosesu nia lala'ok.

Haree husi natureza, misaun no koadjuvasaun PSIK nian hanesan “polízia sientífika” tuir definisaun iha leten iha ambitu investigasaun kriminal nian signifika katak ita tenke dezenvolve liu investigasaun ida sientifika. Tamba interpretasaun ne'ebe “sala” nune'e ninia dezenvolvimentu mos sees husi ninia natureza, misaun no koadjuvasaun lolos. Katak ita la dezenvolve “investigasaun sientífika” maibe dezenvolve liu “servisu polisial”.

Tamba ne'e la nesesariu PSIK atu lori kilat maibe importante liu tenke investe iha sira nia kuiñesementu sientifika no tekniku investigasaun nian no ho apoiu ekipamentu sira ne'ebé modernu no tuir padraun ida sientifika nian hanesan, laboratoriu hodi halo testu ka exame ba objetu sira ne'ebé ema utiliza hodi halo krime.

Exemplu, kazu kontentor sia (9) ne'ebé autoridade seguransa sira prende iha Janeiru 2018, lolos ida ne'e PSIK maka halo testu ka exame ba substansia ka materia prima PCC. Maibe tamba Timor-Leste seidak iha laboratoriu propriu hodi halo testu ka exame ba substansia hirak ne'e. Nune'e tenke utiliza kooperasaun sira ne'ebé iha hodi ba testu iha Indonézia.

Ho ida ne'e, nesesariu tebes atu dezenvolve PSIK iha kapasidade investigasaun sientifika ida hodi tulun autoridade judisiariu sira iha prosesu penal nian. Nune'e PSIK bele atua tuir ninia natureza no nia misaun ne'ebé atribui ba sira iha ambitu investigasaun krime grave, organizada ka kompleksa.

2. Investe ba kilat – aumenta problema

Konsellu Ministru aprova ona pedidu PSIK nian ho Diploma Ministerial N.º 33/2017 de 24 de Maio Aprova o Tipo e o Calibre das Armas de Fogo de Serviço do Pessoal da PCIC no daudaun ne'e sosa ona kilat tamba ejijensia servisu nian iha terenu ka risku sira bainhira hala'o servisu. Perguntas ba ita hotu, serake ejijensia ne'e ita tenke aprova lalais diploma ruma hodi kilat?

Mentalidade husu funu naruk ka konflitu armadu ne'ebé Timor-Leste hakat liu, no to'o agora seidak rekopera lolos husi trauma. Ninia konsekuensia ita forma institusaun kiik ka boot tenke ho kilat. Nune'e mos ita rezolve violênsia sempre ho violênsia. Iha sorin seluk, tinan-tinan efeitu husi utiliza sala kilat sai preokupasaun boot no rezulta vitima kanek, mate no trauma husi kilat ne'ebé sosa ba institusaun sira Estadu nian. Problema ida ne'e to'o agora seidak rezolve ho diak, iha tempu hanesan ita harii institusaun foun sira ho kilat.

Ita tenke aprende husi akontesementu sira iha pasadu kona-bá utiliza sala kilat no kontrola kilat. Exemplu iha fulan Novembru 2018 kazu Kulu-Hun – Dili, ema na'in tolu mate no na'in lima seluk kanek tamba konsekuensia husi utiliza sala kilat no kilat ne'ebé deskontroladu. Ne'e hanesan exemplu ida katak institusaun sira ne'ebé harii kle'ur ona, ne'e mos sei nafatin problema ho utiliza sala kilat no kontrolu ba kilat.

Tanba ne'e, institusaun foun hanesan PSIK no la ho mekanismu no prosedementu sira ne'ebé bele kontrola no nia utilizasaun, kilat ne'e rasik sei sai risku no ameasa bainhira sei hala'o sira nia kna'ar ho kilat.

Tetu ba risku sira ne'e, ho populasaun Timor-Leste ne'ebé ho deit 1.2 milaun (Sensus 2015), institusaun hotu-hotu la'os tenke forma ho kilat. Nomos número kilat ne'ebé iha, labele hanesan ho número populasaun.



Tamba ne'e, ita la bele halo desizaun ida bazeia deit ba ejiensia ida maibe tenke tetu ninia ameasa ka risku no ninia impaktu sira. Bainhira ita halo desizaun bazeia deit ba ejiensia ida atu sosa kilat ba institusaun investigasaun sira. Posibilidade institusaun sira investigasaun nian no seguransa sivil sira hanesan Komisaun Anti Korupsaun (KAK), Autoridade Aduaneira ka Alfândega, Guarda Florestal, Guarda Munisipiu Dili, Guarda Prizional, Migrasaun no Dirasaun Nasional Seguransa Patrimoniú Públiku (DNSPP) sei eji atu hola tan kilat tamba hotu-hotu servisu iha risku nia laran.

Posibilidade ida ne'e sei akontese tan atu hola kilat tanba institusaun hirak ne'ebé temi iha leten ne'e balu simu ona treinamentu kona-bá tiru kilat.

Ho ida ne'e, bainhira kilat aumenta, possibilidade vitima ba efeitu husi kilat sei aumenta mos. Populasaun sira sei sai alvu ba kilat hirak ne'e tamba lisaun sira ne'ebé hatudu pesoal seguransa sira ne'ebé ho kilat dalabalu utiliza poder no kilat ne'ebé iha hodi halo ameasa, intimidasaun no rezolve problema ne'ebé sira hasoru.

Rekomendasaun

1. Governu liu husi Ministru Defeza fó prioridade ba revizaun ba Planu Força 2020 hodi estabelese postura forsa defeza ida ne'ebé realistiku no kontestual. Duke Servisu Militar Obrigatoriu ne'ebé halo baralla deit setor defeza nian no hatodan mos despeza Estadu nian.
2. FM rekomenda ba Ministériu Interior no Komandu Jeral PNTL haree fila-fali esbosu Dekretu-Lei Orgânica PNTL nian no dezenvolve tuir natureza polisiamentu PNTL "polísia komunitária" ne'ebé durante ne'e halo no PNTL nia servisu sai vizivel no hetan konfiansa maka'as husi comunidade.
3. Rekomenda ba Ministériu Justisa halo revizaun ba Orgânica PSIK nian hodi hatuur PSIK nia mandatu tuir lolos nia misaun iha âmbito investigasaun ida sientífika. Nomos Komisaun A no Komisaun B Parlamentu Nasional bolu Ministru Justisa justifika kona-bá razaun sira hola kilat ba PSIK hodi hatan ba polêmica ne'ebé daudaun ne'e espalla iha públiku.



Bibliografia

- Dekretu-Lei N.º 21/ 2014 de 6 de Agosto 1.ª Alteração ao Decreto-Lei n.º 15/2014, de 14 de Maio, Orgânica Políisia Sientífika Investigasaun Kriminal (PSIK).
- Dekretu Lei n.º 9/2009 de 18 de Fevereiro, Lei Orgânica PNTL
- Diploma Ministerial N.º 33/2017 de 24 de Maio Aprova o Tipo e o Calibre das Armas de Fogo de Serviço do Pessoal da PCIC
- Estatutu Militar F-FDTL foun (DECRETO-LEI N.º 33 /2020 de 2 de Setembro NOVO ESTATUTO DOS MILITARES DAS FALINTIL-FORÇAS DE DEFESA DE TIMOR-LESTE)
- Estatutu Militar F-FDTL nian (Decreto-Lei n.º 7/2014, de 12 de março, alterado pelo Decreto-Lei n.º 28/2016, de 13 de junho).
- GLOBAL MILITARISATION INDEX 2019. Asesu iha ne'e:
https://www.bicc.de/uploads/tx_bicctools/BICC_GMI_2019_EN.pdf
- Komunikadu Imprensa Sorumutuk Konsellu Ministrus nian iha loron 28 fulan-outubru tinan 2020. Asesu iha ne'e: <http://timor-leste.gov.tl/?p=26006&lang=tp>
- Lei n.º 2/2007 de 6 de Novembro, Orgânica da Guarda Nacional Republicana
- Planu Estratéjiku PNTL 2014-2018
- Planu Força 2020 (Estudu Força 2020)
- Proposta Orsamentu Jeral Estadu 2021, Livru 2 Planu Asaun Annual
- Programa VIII Governu Konstitusional, 2018. Asesu iha ne'e: http://timor-leste.gov.tl/wp-content/uploads/2018/09/VIII-PROGRAMA-GOVERNU-REVISTU-HOKONTRIBUISAUN_CONSELHODMINISTROS200720181.pdf
- Relatóriu Fundasaun Mahein, 2020. Implementasaun Servisu Militar Obrigatoriu iha Timor-Leste. Asesu iha ne'e: <http://www.fundasaunmahein.org/wp-content/uploads/2020/10/MNL-149-Servisu-Militar-Obrigatoriu-2020PDF.pdf>
- Relatóriu Fundasaun Mahein, 2020. Revizaun Lei Orgânica PNTL Copy husi Portugal Paste iha Timor-Leste. Asesu iha ne'e: <http://www.fundasaunmahein.org/2020/07/03/revizaun-lei-organika-pntl-copy-husi-portugal-paste-ih-timor-leste/>
- Relatóriu Fundasaun Mahein, 2019. Sosa Kilta ba PSIK atu Tiru ka Investiga. Asesu iha ne'e: <http://www.fundasaunmahein.org/2019/05/16/sosa-kilat-ba-psik-atu-tiru-ka-investiga/>
- Relatóriu Fundasaun Mahein, 2013. Servisu Militar Obrigatoriu Iha Timor-Leste. Asesu iha ne'e: http://www.fundasaunmahein.org/wp-content/uploads/2013/05/MNL_Nu.-53_27052013_Militar-Obrigatoriupdf.pdf
- The Asia Foundation, Relatóriu Avaliasaun Servisu Polísiamentu Suku PNTL (OPS), 2018